

MRV

MEĐURELIGIJSKO VIJEĆE U BOSNI I HERCEGOVINI
МЕЂУРЕЛИГИЈСКО ВИЈЕЋЕ У БОСНИ И ХЕРЦЕГОВИНИ
Interreligious Council in Bosnia-Herzegovina

23. 02. 2009.

SAOPŠTENJE ZA JAVNOST O PREDLOŽENIM RJEŠENJIMA ZAKONA O DENACIONALIZACIJI

Skupština Međureligijskog vijeća u Bosni i Hercegovini, na 50. redovnoj sjednici održanoj dana 23.02.2009. godine, razmatrala je, između ostalog i predložena rješenja novog prednacrtu Zakona o denacionalizaciji. Zabrinuti za sudbinu nacionalizovane imovine pravnih, fizičkih lica, vjernika, ali i crkava i vjerskih zajednica, članovi Skupštine MRV donijeli su odluku da se na adekvatan način javnost upozna sa stavovima vjerskih lidera četiri istorijski utemeljene crkve i vjerske zajednice, koje ne žele da preuzmu odgovornost za predložena rješenja.

Prošle, 2008. godine, Vijeće ministara BiH je formiralo Radnu grupu za izradu prednacrtu Zakona o denacionalizaciji (ko zna koju po redu), u čijem radu smo željeli da aktivno učestvuje i Pravna grupa Međureligijskog vijeća (MRV), o čemu smo obavijestili Vijeće ministara. Na jedan od sastanaka Radne grupe pozvana je bila i Pravna grupa MRV-a koja je dala svoje mišljenje o predloženim rješenjima prednacrtu Zakona, koje u velikom dijelu nije prihvaćeno. Prihvaćen je jedino prijedlog MRV-a da se ukine predloženi limit finansijske kompenzacije od 150.000,00 KM po jednom objektu denacionalizacije (zgrada, stan, poslovni prostor i slično). Smatramo da vlasnici treba da se adekvatno obeštete, bez obzira na vrijednost nekretnine.

Osnovni princip predviđenih rješenja "novog" prijedloga (a radi se o kozmetičkim promjenama već ranije u Parlamentu odbijenog prijedloga tzv. Begićevog Zakona o denacionalizaciji) je naturalna restitucija objekata, odnosno nekretnina koje se mogu vratiti izvornim vlasnicima, tačnije na kojima se može izvršiti denacionalizacija. Daljnji princip je, ukoliko naturalna restitucija nije moguća, da se izvrši naturalna kompenzacija, odnosno da se izvornim vlasnicima umjesto konkretne nacionalizovane nekretnine, vrati odgovarajuća nekretnina čiji vlasnik je država Bosna i Hercegovina, naravno ukoliko ta imovina postoji. Sa ovim principima je MRV u potpunosti saglasno i ista u cijelosti prihvata i podržava.

Međutim, ukoliko ni ovako rješenje nije moguće, predviđena je finansijska kompenzacija, odnosno naknada, kao obeštećenje za nacionalizovanu imovinu, ali u dugom vremenskom periodu od 20 godina, i to u državnim obveznicama, i u maksimalnoj vrijednosti po jednoj nekretnini od 150.000.00 KM, što je za sve izvorne vlasnike neprihvatljivo, čak uvredljivo, te predstavlja novi oblik nepravde, koji je definitivno, defacto i dejure otuđenje nekretnina od izvornih vlasnika.

MRV

MEĐURELIGIJSKO VIJEĆE U BOSNI I HERCEGOVINI
МЕЂУРЕЛИГИЈСКО ВИЈЕЋЕ У БОСНИ И ХЕРЦЕГОВИНИ
Interreligious Council in Bosnia-Herzegovina

Respektujući činjenicu da je prošlo više od 50 godina od nacionalizacije, te da naturalna restitucija u mnogim slučajevima neće biti moguća, a kako država neće imati šta da ponudi kao naturalnu kompenzaciju, MRV stoji na stanovištu da je jedino prihvatljiv naredni princip finansijska kompenzacija, ali u stvarnoj tržišnoj vrijednosti oduzete, odnosno nacionalizovane imovine, bez limita vrijednosti, u rokovima koje država može uredno servisirati.

Također, MRV stoji na stanovištu da svi učesnici u restituciji moraju pred Zakonom biti jednaki i da niti jedno zakonsko rješenje ne bi smjelo da favorizuje, odnosno preferira niti jednog od učesnika, bilo da se radi o vjerskim zajednicama, pravnim ili fizičkim licima.

Posljednjim Zakonom o izmjenama i dopunama Zakona o prodaji stanova na kojima postoji stanarsko pravo, utvrđeno je pravo korisnika da otkupe i nacionalizovane stanove, što predstavlja oblik "zakonski uređene otimačine". S tim u vezi, opravdano je strahovanje da se sličan scenarij sprema i predloženim rješenjima Zakona o denacionalizaciji, u čemu MRV ne želi učestvovati.

Možemo konstatovati da određene grupe političara kao i lobista u vlastima BiH institucija pokušavaju da zaobiđu pravdu i pravičnost i pokušavaju da legalizuju nepravdu koja se počinila prije 50 god. kada je izvršena nacionalizacija. Vjerske zajednice i crkve ne žele da učestvuju u takvom poslu i žele jasno da kažu da su svi oni koji uporno izbjegavaju da podrže restituciju oduzete imovine odgovorni, kako pred Uzvišenim Bogom, tako i pred svim čestitim ljudima ove Zemlje.

Nužnost brzog donošenja Zakona o restituciji ili denacionalizaciji, kako stoji u radnom tekstu, jedna je od bitnih pretpostavki evropskih integracija, te s tim u vezi i MRV se zalaže za hitnost donošenja ovog, tako davno obećanog i neophodnog zakona, ali zakona koji će slijediti puteve pravde i pravičnosti. Skupština MRV ponovo naglašava hitnost donošenja ovog Zakona jer se u praksi već dešavaju razne manipulacije sa nacionalizovanom imovinom, koje će se teško ispraviti u budućnosti.

Skupština MRVa:

Dr. Mustafa Cerić,
Reisu-l-ulema
Islamska zajednica u BiH

gosp. Vasilije Kačavenda
episkop zvrničko-tuzlanski
Srpska pravoslavna crkva

Vinko kardinal Puljić
Nadbiskup Vrhbosanski
Katolička crkva

Jakob Finci
predsjednik
Jevrejska zajednica